

## BERTSO BERRIAK

Miren Amuriza

### Aldiro ederrak gara



#### I

Andere askoren asteburuan  
ezinbesteko bi pieza:  
larunbat goizez pelukeria  
eta igandean meza.  
Neuk ere ile apaindegian  
hartu dudanez sorpresa,  
nahiago nuke edozeinentzat  
bertsoz azaldu baneza,  
nola bihurtzen dituzten gure  
amonatxoak printzesa.

#### II

Zapaturo lez bakar-bakarrik  
etorri da Margarita,  
atzamarrean eraztuntxo bi  
ta jaka beltzez jantzita.  
Gaztetan oso ederra zela  
xuxurlatu du irrika,  
baina nolatan oroituko du  
oraindik dela polita?  
Ispilu aurrean azkenengoz noiz  
jarri zen ere ez daki-ta...

#### III

Fruta dendako poltsa birekin  
sartu da amama Mari,  
bere txikian txorien gisa  
hasi da kontu kontari,  
kartera ireki ta atereaz  
bertatik paper ugari,  
harro esan du "hauexek dira  
Andoni eta Izadi",  
ta irri eginez muxu eman dio  
biloben argazkiari.

#### IV

Bere alabari eskua emanda  
ailegatu da Bittori,  
kontatu ditu baserriari  
buruzko mila istori:  
nola ardien bila joan ta  
ia-ia zen erori,  
nola kereizak jaten ikusi  
dituen hiru-lau txori...  
Baina bakarrik sentitzen dela  
ez dio esan inori.

#### V

Margaritari permanentea  
egin diote aurrena,  
Mariri adatsa orraztu ondoren  
artez jantzi diadema,  
Bittorirentzat ezpain larrosak  
eta eskutako krema...  
Halaxe eskaini dute hirurek  
irribarre gozoena;  
ez al da horixe emakume bat  
gehien edertzen duena?

#### VI

Udaberria berdez jantzia,  
urdinez bustia udara,  
udazkenaren horia elurrak  
negutzen du mara-mara.  
Emakume bat lau urtarok  
bezala aldakorra da;  
gaztetan gori, geroan zuri  
iletik begietara,  
nahiz kolorea aldatzen zaigun  
ederrak aldiro gara.

DOINUA: "Aita izena".



Bidali zure sortak [bertsoak@argia.com](mailto:bertsoak@argia.com) helbidera. Aukeratuak orri honetan argitaratuko ditugu.